

GÁLATAS

Pablo queétdih ã t̄yayat t̄utat

1-2 Weém, Pablo, biíhdih daacát t̄utnít, yeéb Galacia baácdih jumni t̄tchinadih moón Jesúíhwādih wā wahna caá. Nihat wājeéh jumnit Jesúíhwābūt yeebdih ñ t̄yayat t̄utna caá. Weém, Pablodih jíí Jesucristo ñ níwip jí, áih t̄áini doonádih wā naóh jib bohéát pínah niijná. Cāacwā weemdih ñ naáwát t̄utcap jí. Obohjeéhtih, Jesucristo, Dios jwī íip caán w̄unnijidih booanibūt weemdih ñ níwip jí. Páant ñ naáwát t̄utni jumna, nin náodih yeebdih wā daác wahna caá. **3** Dios jwī íip, jwī Maáh Jesucristobūt yeebdih oinit, ñ tái teo wáaca naáh, ñi tái jumat pínah niijná. **4** Dios jwī íip ñ náahat pahjeh, caán Jesucristoboó jwī yéejat jíib, át w̄an w̄uhap w̄ut jí,* ñ teo wáacatjih yeejépwā ñ jumat pah nihcan, yéej chājatdih jwī yap yohat pínah niijná. **5** Páant ñ chājatdih jéihna, “Paá, meém nihatdih jéih beedáni jumna, cāacwādih jígah ennit, mapí tái teo wáacna caá”, jwī íipdih yeó jáap jumat pah bádí jwī niíj wēi naáwát dée caá. Páant tií jwī niíj wēi naáwáp.

Dios cāacwādih ded pah ñ tái ubat

6 Yeébboó ded pah ñi chājat doonádih joinít, weém bádí wā náhni dawhana caá. Dios yeebdih bádí oina, át níwip taga, Jesúsdih jepahnit, áihwā ñi jumat pínah niijná. Obohjeéhtih, páant yeebdih

* **1:4** Mt 20.28; Mr 10.45; 1Ti 2.6; Tit 2.14

búdí ã oyochah yuhna, waícanjeh biíh bohéátdih joinít, Jesucristoboodih cádahna caá ñi chājap. Páant ñi cádahat doonádih joinít, “¿Dépanih tigaá waícanjeh ï tåut nuúm?” niíj jenah joinít, wã wáhi bejep be. ⁷ Biquína ñi pebh jumnit, yeebdíh tac buugána, mácah bohénit, Jesúih táini doonádih ï yéejana caá. Páant yeebdíh naóhna, nin pah ï niíj yee bohéra caá: “ ‘Tái ubnit jumat tåut nijjná, Jesucristodihjeh ñi túi jepahaá’, Pablo niíj naóh bohéra, yeebdíh ã nih yáana caá. Diosjeéh tái jumat tåut nijjná, jwí nuowá ï naawátjidihbüt tái jepahat caá náahap”, ït niíj yee naawáp wut be. Obohjeéhtih, “Nin táini dooná caá”, ï niíj naóhniboo táini dooná yoobát nihcan caá. ⁸ Jwiít, Dioih ángel japmant júohni, yeebdíh jwí jwíih bohéátdih mácah jwí bohénachah, jwiítdih Dios búdí peéh chājna, iiguípna ã waha naáh. ⁹ Wã naawátji pah wã jwúub naóhbipna caá, páant muntih: Yeebdíh jwí jwíih bohéátdih ñi túi jepahachah yuhna, det yeebdíh mácah ï bohénachah, Dios queétdih búdí peéh chājna, iiguípna ã waha naáh.

¹⁰ Páant nijjná, “Caánboo tigaá túi bohéri ã jumap”, weemdih cääcwaá ï nijjátdih wã bidcan caá. Obohjeéhtih, Diosboó weemdih “Meém ma tái bohéra jíi”, ã nijjátdihjeh caá wã náahap.* Cääcwaátdih weñálhnit bohéra, Cristoboodih wâta weñacan tagaa. Páinh weñacan, caandih teo wáhni wâta jumcan taga.

Cristo Pablodih ded pah ã tåut nuumáti

¹¹ Wã déewá panihnitá, nindih ñi jéihyat pínah yeebdíh wã náah yacna caá: Wápí bohéri táini

* **1:10** 1Ts 2.4

dooná cääcwä ījenah joyätjijeh nihcan beé. **12** Ded cääcdih wā joiníji doonábut nihcan beé. Bita weemdih ī bohécan beé. Obohjeéhtih, Diosjeh weemdih ded pah ã wãúh ã jumatdih ã bohénap jī.

13 Jesucristodih wā jepahat pínah jātih, jwiít judíowā jwī n̄owā ī naáwátjidih wā tái joí waadánap jī. Pánih tái joí waadáni wā jumuchah, ded pah wā chājatji doonádih yeéb ñit joijí tagaá. Pánih jumnit, Jesúhwā Diosdih yap yohnit ī jumatdih jenah joinít, eníhcan, bádí yeejép chājna, queétdih wā tái mao beedá bojíhip yah jī.* **14** Jwī n̄owā ī naáwátjidih tái jepahíhna, weém biíc yoobó behnit chah wā tái bohénap jī.*

15-16 Obohjeéhtih, wā cääc jumat pínah jātih, Dios weemdih bádí oina, átát ñíojip taga, áih táini doonádih wā bohéát pínah niijná. Pánihna, yeejni wā jumuchah yahna, ã náahni yeó jáapdih Jesús ã wahniji ã jumatdih weemdih ã jéihyanap jī. Pánih jéihyanit, judíowā nihcannit pebhboó ã wahap jī, áih táini doonádih queétdih wā naáwát pínah niijná. Páant ã wahachah, “¿Ded pah tigaá weemdih niij bohéát náah?” cääcwädih wā niij wábh joí encap jī.* **17** Jesús áih táini doonádih naáwát tútnit maáta, wā jātih ã ñíonit ë jumuchah yahna, Jerusalén tútchina queétdihbut míic wéhenadih wā bejcap jī. Caanná bej jwahcanjeh, Dios ded pah weemdih ã náah yacatdih jéihíhna, Arabia baác cääc wihcpoó caandíh wábúdih wā bejep jī. Caánboó jumniji Damasco tútchina wā jwáub juibínap jī, páant mæntih.

* **1:13** Hch 8.3; 22.4-5; 26.9-11 * **1:14** Hch 22.3 * **1:15-16** Hch 9.3-6; 22.6-10; 26.13-18

18 Biíc peihcanni jópchi táttimah, Jerusalén tátchina Pedrodih enedih wā bejep jī baca.* Caanná chéne semanabitjeh wā jumap jī. **19** Jesús āih doonádih ã naawát táttnit bita maátadih wā jwāáhcap jī. Obohjeéhtih, Santiago jwī Maáh úuddih pohba wā jwāááp jī. **20** Páant wā daacáchah, wā naawát yoobópdih ã jumatdih Dios ã jéihna caá.

21 Táttimah, Siria baác, Cilicia baácnabut naóh jibidih wā bejep jī. **22** Caanná wā jib bejechah, Judea baácboó jumnit Jesúíhwā weemdih ī jwāáh jwahcap jī. **23** Ded pah wā chāyat doonádihjeh Ítát joyóp tajī. “Jātih jwiít Jesúíhwādih yeejép chājna, táini doonádih jwiítdih cádahat táttniji buu caán doonádihjeh jwāub naóhna caá ã chājap, cāacwā Jesúsdih ī jepahat pínah niijná”, Ít niíj míic wéhenap wat jī. **24** Páant wā tát nuumát doonádih joinít, “Paá, caandih mat tái teo wáacap taga”, Diosdih bádí Ít niíj wēi naawáp wat jī.

2

Cristo ã naawát táttnit maáta Pablodih ī wēi jwāáát

1-2 Catorce jópchi táttimah, Diosboó weemdih Jerusalén tátchina ã bejat tátuchah, Bernabéjih caanná wā jwāub bejep jī. Pánih bejna, Titodihbut jwī nuumah bejep jī.* Caánboó judío nihcanni, jwī nuowā ī wat pah bóodcanni ã jumap jī. Caanná jui'bína, caánboó jumnit Jesúíhwā ī maátajeh ī míic wáacachah, judíowā nihcannitdih táini doonádih ded pah wā bohéátdih queétdih wā naawáp jī. Pánih naóhni, ded pah wāpí bohéátdih queét ī

* **1:18** Hch 9.26-30 * **2:1-2** Hch 11.30; 15.2

tái jéihyatdih wā náah yacap jī. Pánih jéihcan, wā bohéátdih ī wēicah, wā tewat b̄uudní ãta jum taga. Obohjeeéhtih, ded pah wā bohéátdih jéihnit, ī tái weñep jī. ³ Páant wā naáwáchah wēi joiná, Tito bóodcanni ã jumachah yuhna, “Meembát ma bóodat táutá”, caandíh ī niijcáp jī. ⁴ Queét maáta biícdih jwī míic wéhe láá, jwiít Jesúíhwā nihat biícdih jwī míic wáacachah, biquína “Jesúsdih jepahnit jwī jumna caá”, niíj yeenitbut īt waadáp jī. Pánih waadnít, judíowā nihcannitdihbut ī bóodat táutap yuh jī. Obohjeeéhtih, b̄uu Jesúíhwā jumna, jwī n̄uowā ī naáwátjidih jepahcan, Jesúsdihjeh jwī tái jenah joiná caá. “Páant jwī chājachah, jwī íipboo jwiítdih ã tái enna caá”, jwī niíj jéihna caá. Páant niíj jéihnit jwī jumachah enna, jwiítdih jéihñat táut niijná, ded pah jwī chājatdih jéihíhna, queét jwījeéh īt waadáp tajī. Pánih waadnít, jwī n̄uowā ī naáwátji biíc yoobó jwiítdih ī jepah beedáát táutap yuh jī, páant m̄untih. ⁵ Páant ī wətachah yuhna, táiini doonádih ñi jéihyat pínah niijná, jwiítbóó queétdih jwī jepahcap jī.

⁶ Pánihna, Jesúíhwā ī maáta túini doonádih ded pah wā bohéátdih joinít, “Ma bohéát pahjeh tih judíowā nihcannitdih ma bohénáá”, niíj naóhni, weemdhíh biíh wutatdih ī bohéát táutcap jī. Queét Jesúíhwā ī maátadih “Queétboó chah jéihnit caá”, biquína ī niíj jenah joyóchah yuhna, dedé pínah weemdhíh nihcan caá. Diosboó nihatdih biíc yoobó ã jenah joiná caá.* ⁷ Queét ded pah wā bohéátdih tái wēinit, “Pedrodih jwiít judíowādih ã bohéát pínah niijná, Dios át ñíojip taga. Pánihat pah,

* ^{2:6} Dt 10.17

Pablodihbüt judíowā nihcannitboodih āt bohé jibat tāutap taga”, ī míic niijíp jī. ⁸ Judíowādih Pedro ã bohénachah, Dios bádí āt teo wáacap wāt jī. Weembüt judíowā nihcannitdih wā bohénachah, Dios biíc yoobó ã teo wáacachah, queétbüt ī tái jepahap jī.

⁹ Pánihna, Santiago, Pedro, Juanjīh, Jesúíhwā ī maáta yoobát, Dios weemdih bádí ã teo wáacatjidih jéhnit, “Dios yoobópdih āt ñío wahap taga, jwī déewā nihcannitdih ã naawát pínah niijná”, ī míic niijíp jī. Páant niijnít, weemdih Bernabédihbüt bádí wēinit, “Jwī tái míic teo wáac jīh”, niijná, jwī míic māj tewep jī. Pánih māj teonit, “Yeéb jwī déewā nihcannitdih ñi bohéátji pah ñi tái naawá. Jwiítboó jwī déewādihjeh jwī naóhbipna caá”, Santiagoowā jwiítdih ī niijíp jī. “Páant tií ã jumuh nah”, jwī míic niijíp jī. ¹⁰ Páant niijná, Jesúíhwā moh yéejnitdih jwiítdih ī teo wáacat tāutap jī. Weembüt moh yéejnitdih bádí jīgah ennit, wāpī teo wáacna caá. Páant niíj míic wéhe péanit, jwiít Antioquia tátchina jwī jwūub bejep jī.

Pablo Pedrodih ã jāihñat

¹¹ Túttimah, Pedrobüt Antioquia tátchiboó ã juibínap jī. Obohjeéhtih, jwī pebhna juibíniji, yoobópdih ã chājcat peéh caandih wā jūihñap jī. ¹² Nin pah ã chājap jī: Jwī nuowā “Jwiít judíowā bóodcannit biícdih jwī jeéméchah ã tāican caá”, ī niijátji ã jumuhchah yuhna, Pedroboó jwī pebh jwiíh juibína, jwī déewā nihcannit biícdih ã tái míic wēp jwuhñap jī.* Obohjeéhtih, biquína jwī déewā, Santiago ã chéenwāboó ī juibínachah ennit, jwī déewā

* **2:12** Hch 11.2-17

nihcannitdih cádahnit, Pedroboó “*Buu juiñít bóodat túutnit weemdih juihná*”, niijná, ījeéh ã jwáub míic wépcap jī. ¹³ Páant ã yee buugúchah ennit, bita jwí déewábüt caandíh míic jéih ennit, queétbüt biíc yoobó ñ cádahap jī. Bernabé yuh buca túi jéihni jumna yuhna, queét ñ chājat biíc yoobó caanbát ã cádahap jī. ¹⁴ Pánih cádahnit, “Nihat Jesúsdihjeh jepahnitdih Dios biíc yoobó ñ wēi enna caá”, īpí niij bohéát pah queét ñ cádahap jī. Páant ñ cádahachah ennit, nihat Jesúíhwā ñ joyóchah, nin pah Pedrodih wā niij jaihnhp jī: “Meém judío jumna yuhna, Jesucristodih jepahna, jwí nuowā ñ naawátjidih ma tái jenah joí cádahap jī. Pánih cádahnit, judíowā nihcannit ñ chājat pah queét biícdih ma tái jeémp jwuhhp be. Obohjeéhtih, buu queétdih cádahnit, jwí nuowā ñ naawátjidih ma jwáub jepahachah ennit, queét jwí déewā nihcannit nin pah ñ niij jenah joiná nacaá: ‘Pedro páant ã jwáub jenah joyóchah, queét judíowā ñ nuowā ñ naawátjidih jwiítdihbüt jepahat caá náahap’, ñ niij jenah joiná nacaá. Páant ma chājat ã túican caá”, Pedrodih wā niijíp jī.

Jesúsdih tái jenah joinítdih Dios ñ wēi enat

¹⁵ Jwí nuowā judíowājeh ītát jumhp tají. Pánihna, jwiítbüt ñ jumená judíowājeh māntih jwí jumna caá. Pánih jumnit, Dios ã wutatdih jéihnit jwí jumna caá. Obohjeéhtih, queét judíowā nihcannit Diosdih ñ jéihcan caá. ¹⁶ Pánihna judíowā jumna yuhna, caán wutatdih jwí jéih jepah beedácatdih jwí jéihna caá. Caandíh jepahcat jíib “Queét túinit caá”, jwiítdih Dios ã niij encatdihbüt jwí jéihna caá. Obohjeéhtih, Jesucristodihjeh tái jenah joinít jwí jepahat jíib, “Queét túinit caá”, Dios jwiítdih ã

niíj enna caá. Pánih jéihnit, jwiít judíowā yəhna, Jesucristodihjeh táí jenah joinít, jwī jepahap jī, “Queét táinit caá”, Dios jwiítdih ã niíj enat pínah niijná. Jwiít cääcwā Moisés ã wütatjidih jéih jepah beedácannit míic jwī jumna caá. Pánihna, caandíh jwī jepahcat jíib, “Queét táinit caá”, Dios ã niíj encan niít. Caandíh jéihnit, “Caán wütatdih joí waadánachah, Dios jwiítdih ã táí wēi enna caá”, jwī niíj jenah joicán caá.*

¹⁷ Pánihna, Cristodih jepahnit, “Queét túinit caá”, Dios jwiítdih ã niíj enat pínah niijná, caán wütatdih cádahna caá jwī chājap. Obohjeéhtih, páant jwī cádahachah ennit, bita jwī déewā caán wütatdih táí jepahat túutnitboó “Queét jwī déewā nihcan-nit pah yéej chājnit ī jumna caá”, jwiítdih ī niíj jenah joiná caá. Páant ī niíj jenah joyát pah jwiítbüt jenah joinít, “Moisés ã wütatjidih cádahat túutnit, Cristo jwiítdih ã yéej chājat túutna caá”, jwīta niíj jenah joi tágaa. Obohjeéhtih, páant nih-can caá. Pánihna, “Jesucristodih jepahna, Moisés ã wütatjidih jwī cádahat jíib, yéejnit jwī jumna caá”, jwī niíj jenah joicán caá. ¹⁸ Cääcwädih nin pah wäpī niíj naóh bohéna caá: “Diosjeéh táí jumíhna, jwī nəowā ī naawátjidih jenah joicán, Jesucristo-boodihjeh táí jenah joinít, jepahat caá náahap”, wā niijná caá. Obohjeéhtih, páant niíj bohéniji jwūub túut nəumnít, “Diosjeéh táí jumat túut niijná, jwī nəowā ī naawátjidih táí jepahat caá náahap”, niíj naóh bohéna, yéej chājni yoobát wāta jum tagaá. ¹⁹ Moisés ã wütatjidih weémboó táí jepah-canni jumna, caandíh yap yohni wā jumna caá.

* **2:16** Sal 143.2; Ro 3.20,22

Pánih yap yohni wā jumatdih jéihna, “Caandíh wā jepahcat jíib, Dios weemdih ã wēi encan caá”, wā niíj jenah joiná caá. Páant niíj jenah joinít, Dios biícdih táí jumat téut nijjná, caán wutatdih jenah joí cádahnit, Jesucristoboodíjhéh táí jenah joinít, wā jepahna caá. ²⁰ Caánboó weemdih oinit, wā yap yohat peéh cruzboó ã wān wāchah, weembát ãjeéh biícdih wānni pah wā jumna caá. Pánih wānni pah jumna, weém wā jenah joyátdihjeh chāj cádahnit, Cristoboodíh táí jenah joinít, jepahna caá wā chājap.* ²¹ Pánihna, “Dios jwiítdih bádí ã oyochah, Cristo ã wān wāhat dedé pínah nihcan caá”, wā nijjcán caá. Obohjeeéhtih, Dios ã wutatdih jepahat jíbjeh ãjeéh jwīj táí jumchah, Cristo ã wān wāhat dedé pínah ãta nihcan tagaá.

3

Jesucristodihjeh jepahat caá náahap

¹ ¡Yeéb Galacia baácdih moón Jesúíhwā jenah joicánnit ñi jumna caá! Jesucristo cruzboó ã wān wāhat doonádih yoobópdih yeebdíh wā naawáp jí. Páant wā naawátdih ñi táí jepahachah yuhna, būu ¿Dépanih tigaá bitaboó yeebdíh mácah ñi naawáchah joinít, ñi jepah? ² Nindih wāát jenah joí en tigaá: ¿Moisés ã wutatjidih ñi jepahat jíib niít Táini Espíritu ñijeéh át jwíih jum? Nihcan caá. Obohjeeéhtih, táini doonádih joiná, Cristodih táí jenah joinít, ñi jepahachah, ñijeéh át jwíih jumap be. ³ Táini Espíritu ã teo wáacatjíh Cristodih ñi jwíih jepahna yuhna, ¿Dépanih tibeé būu jwáub téut nuumnít, ñi jenah joyájtjhéh Moisés ã wutatjidih

* **2:20** Fil 1.21

jepahna caá ñi chājap? Pánih chājna, jenah joicánnit ñi jumna caá. ⁴ Táini doonádih ñi jepahatji jíib dawá láa táini yeebdíh át yapjip tagaá. ¿Páant yeebdíh á táí yapatjidih ñi quíib būudá niít? Oboh pohba páant yapna át chājjican tagaá. ⁵ ¿Ded pah ñi chājatji jíib tibeé Dios yeebdíh Táini Espíritudih át wāhji? ñi jenah joyóchah. Moisés á wātatjidih ñi jepahat jíib nihcan, áih táini doonádih joinít, Cristodih ñi jepahat jíib, yeebdíh Táini Espíritudih át wāhup taga. Páant á jumuchah, Jesucristodih ñi táí jepahat jíib cāacwā ī jéih chājca naáhdih Dios á wēpatjih yeebdíh á chāj jumuchat túutna caá.

Abraham Diosdih á táí jenah joyát

⁶ Buh, jwī n̄eo Abraham ded pah á chājatjidih jwī jenah joyát dée caá. Dios caandih á naáwátdih át táí jenah joyóp wāt jī. “Meemdih wā táí chājbipna caá”, Dios á niijíchah, á táí jenah joyát jíib, “Caán Abraham táini caá”, Dios caandih át niij enep wāt jī.* ⁷ Pánihna, caán Diosdih á táí jenah joyát pah, jwiítbut páant táí jenah joinít, Abraham á jumelená panihnit jwī jumna caá.* ⁸ Judíowā nihcannitbut Diosdih í táí jenah joyóchah, “Queét téinit caá”, Dios á niij enna caá. Páant á niij enat pínahdih jéihna, Dios nin táini doonádih Abrahamdih jātih átát naáwáp wāt jī: “Weemdih ma táí jenah joyát jíib nihat nin baácdih moondih wā táí chājbipna caá”, át niijíp wāt jī.* ⁹ Pánihna, Abraham caandih á táí jenah joyóchah enna, Dios caandih á táí chājatji

* **3:6** Gn 15.6; Ro 4.3 * **3:7** Ro 4.16 * **3:8** Gn 12.3

pahjeh, buu láabut det Diosdih tái jenah joinítdih biíc yoobó ã tái chājbipna caá.

10 Obohjeéhtih, ded “Moisés ã wutatjidih jepahíhna, Dioíh wā jumbipna caá”, niíj jenah joinítdih bádí peéh chājat ã jumbipna caá. Nin pah Moisés ãt niíj daacáp tají: “Ded wā wutatjidih tái jepah beedácannidih bádí peéh chājat ã jumbipna caá”, ãt niíj daacáp tají.* **11** Biíh naóh yapani nin pah ãt niíj daacáp tají: “Diosdih tái jenah joí, jepahnitboodih ‘Queét táinit caá’, Dios ã niíj enbipna caá. Pánih jepahna, páantjeh Diosjeéh ï tái jumbipna caá”, ãt niíj daacáp tají.* Páant ã nijjátji yoobópdih ã jmuchah jéihnit, nindihbut jwī tái jéihna caá: Ded Moisés ã wutatjidih ã jepahat jíib “Caán táini caá”, Dios ã niíj encan niít. **12** “Ded Diosdih tái jenah joiní, ã jepahachah, ‘Caán táini caá’, Dios ã niíj enbipna caá. Ded weemdih Dios ã wutat tái wutatjidih tái jepah beedánijeh Dios biícdih ã tái jumbipna caá”, Moisés ãt niíj daacáp tají.*

13 Jwiít nihat caán wutatdih jwī tái jéih jepah beedácah, jwiítdih Dios ã peéh chājbipna caá. Páant ã peéh chājat jwiítdih ã jmuchah enniti, Cristoboó caán ã peéh chājat déedih jíib chājniti, jwiítdih ãt wan wāhup wat jī. Caandih cruzboó ï péoh dodh mawat pínahdih jenah joinít, jon játih nin pah ït niíj daacáp tají: “Ded máa nahdih ï mao yaíhniwoó bádí peéh chājni ã jumbipna caá”, ït niíj daacáp tají.* **14** Páant ï niíj daacátji pahjeh tih Cristo nin baácboó ã jmuchah, caandih ãt yapap tají. Caandih páant ã yapatjí jíib, “Nin baácdih moondih wā tái chājbipna

* **3:10** Dt 27.26 * **3:11** Hab 2.4 * **3:12** Lv 18.5 * **3:13** Dt 21.23

caá”, Abrahamdih ã nijjátji pahjeh tih jwī déewā nihcannitdih Dios ãt tái chājap taga. Páant Cristo ã wān wāhchah, caandíh túi jenah joinít, jwī jepahachah ennit, “Téini Espíritudih wīih cāacwādih wā wāhbipna caá”, ã nijjátji pah jwiítdih ãt wāhup jī.

Dedé pínah tigaá Moisés ã wātatjī

¹⁵ Wā déewā panihnitá, Dios jwī nāo Abrahamdih ded pah ã chājatjidih yeéb ñi beh joyát pínah nijjná, ded pah jwiít cāacwā jwīpī chājatdih yeebdíh wā náhniabipna caá. Jwiít biíhdih nin pah jwīpī niíj naóhna caá: “Nin pah meemdih wā chājbipna caá”, jwī nijjná caá. Páant jwī nijjátjidih biíhboó ã jéih jwāub túut nāumcán niít. “Páant ã nijjátji pah ã chājcan niít”, bitaboó ï jéih nijcán niít. ¹⁶ Caán jwī nijját pahjeh māntih, Dios jwī nāo Abrahamdihbüt nin pah ãt niíj naawáp wāt jī: “Weemdih ma tái jenah joyát jíib, nihat baácdih moondih wā tái chājbipna caá”, caandíh, ã juimadihbüt ãt nijjíp wāt jī. Páant nijjná, nihat ã juimená yoobátdihjeh nijjná ãt chājcap wāt jī. Biíc ã juima, tāttimah bóo láá jumni Cristodih nijjná ãt chājap wāt jī.* ¹⁷ Buu yeebdíh wā tái jéihya naóhbpna caá: Jwī nāo Abrahamjidih “Meemdih wā tái chājbipna caá”, Dios ã nijját tāttimah, cuatrocientos treinta jópchi yapat tāttimahna Moisésjidih ãt wātat túutup wāt jī, ãih cāacwā ï jepahat pínah nijjná. Pánih wātna yāhna, “Abrahamdih wā jwíih nijjátji pah, túut nāumcánjeh, biíc yoobó wā péabipna caá”, Dios ãt nijjíp wāt jī.* ¹⁸ Pánihna, Dios biícdih jwī tái jumat

* **3:16** Gn 12.7 * **3:17** Ex 12.40

pínah Moisés ã w̄tatjidih jw̄í jepahat jíib nihcan caá. Páant ã j̄umachah nihna, Diosdih Abraham ã tái jenah joyát pah, caandíh jw̄í tái jenah joyát jíib ãta nihcan tagaaá. Obohjeéhtih, Diosdih Abraham ã tái jenah joyát pahjeh m̄untih, jwiítbat caandíh jw̄í tái jenah joyóchah, “Yeéb táinit caá”, Dios jwiítdih ã niíj enna caá.*

19 Páant ã j̄umachah, ¿dépanih tigaá Dios caán w̄tatdih ãt naóhji? Abrahamdih páant ã nijjátji táttimah, caán w̄tatdih ãt naóhjip taga, jwiít cääcwä yéej chäjnit jw̄í jumatdih jw̄í jéihyat pínah nijná. Abrahamdih Dios ã naawátji táttimah, caán w̄tat jwiítdih ãt jumap j̄i, p̄áú Abrahamji ã j̄uima Cristo cääc jumnit, ã w̄n w̄h láana. Dios ã w̄tatdih ãih ángelwäboodih Moisésjidih ãt naóh yapaat tåutap w̄t j̄i. Queét Moisésdih cääcwädih ït jw̄ub naóh yapaat tåutap w̄t j̄i.* **20** Caán w̄tatdih Moisésdih ã naóh yapaat tåutuchah, Dios caanjéh pohba cääcwädih ãt naóhcap w̄t j̄i. Obohjeéhtih, “Meemdih tái chäjnit, ma j̄uimajih nihat cääcwädihbat wā tái chäjbipna caá”, Abrahamboodih niíj naóhna, caanjéh páant ãt niíj naawáp w̄t j̄i.

Cristo nihat Moisés ã w̄tatjidih ã péaat

21 ¿Dios Moisésdih ã w̄tatjidih naóhna, Abrahamdih ã nijjátjidih “Wā nijjátji pah wā péacan niít”, niíj niít ãt chäjap? Páant ãt nijjícan tagaaá. Abrahamdih ã nijjátji pahjeh biíc yoobó ã péabipna caá. Dios biícdih tái jumat tåut nijná, ã w̄tatdih jepahna, caán láá bácah, ã w̄tatjidih jw̄í tái jepah

* **3:18** Ro 4.14 * **3:19** Ro 4.13

beedánachah, dedé peéh chājat jwiítdih ãta wihsan tagaá. ²² Obohjeéhtih, jwiít nihat cääcwä yoobó yéej chājnit miic jumna, jwī yéejatdih jwī jéih cádahcatdih Dios naawátboó ã naóhna caá. Páant jwī jumchah, Diosdih Abraham ã túi jenah joyát pahjeh muntih, jwiítbut Jesucristodih jwī túi jenah joyóchah, jwiítdih Dios ã túi ubbipna caá.

²³⁻²⁴ Buu láa, Dios biícdih túi jumat tåut nijjná, ã wahni Cristodih túi jenah joinít, jepahat caá náahap. Obohjeéhtih, Cristo ã jéewát pínah jåtih, Moisés ã wåtatjidih túi jepahíhna yuhna, yéej chājnit jumna, jwī jéih jepahcap jí. Páant jwī jepahcat jíib, Dios bùdí ã peéh chājnit pínah jwī jumap jí. Páant jwī jumatdih jéihnit, jwiítdih túi ubni pínahdih jwī bidip jí. Páñih bidnit, Cristoíh taini doonádih joinít, caandih jwī jepahap jí, “Queét tainit caá”, Dios jwiítdih ã niíj enat pínah nijjná. ²⁵ Páñihna, Dios biícdih túi jumat tåut nijjná, buu Cristodih jwī túi jenah joiná caá. Páant jwī jumchah, caán wåtatboó jwiítdih bohéni panihni ã nihcan caá, buca. ²⁶ Jesucristodih jepahnit jumna, yeéb nihat Dios ã weh ñi jumna caá. ²⁷ Cristo ã wépatjih daabánit jumna, caán biícdih jwī jumchah, “Wä wåáh ã jumat pahjeh tih yeebbút ñi jumna caá”, Dios jwiítdih ã niíj enna caá. ²⁸ Páñihna, Cristo biícdih jumna, chéne poómp jwī nihcan caá. Páñih biíc poómpjeh jumna, “ ‘Jwiít judíowä nihcannit, queét judíowädih mácah caá’, Dios ã niíj enna caá”, ñi niíj jenah joicá bojoó. Teo wåhnit, teo wåhnit nihcannitdihbut; neoná, yaádhdihbüt “Nit mácah caá”, Dios ã niíj encan caá. Páñihna, yeéb nihat Cristoíhwä jumna, biíc poómpjeh tigaá ñi jumap. ²⁹ Cristoíhwä jumna, Abraham jaimená panihnit

ñi jumna caá. Páant ñi jumchah, Diosdih Abrahamji ã túi jenah joyát jíib caandih ã nijátji pahjeh mantih, Jesúsdih ñi túi jenah joyóchah, yeebdíhbüt ã túi chājbipna caá.

4

Teo wāhnit nihcan, Dios ã weh jwī jumat

¹⁻² Ded pah jwiít cääcwa biíh jwípí chājatdihbüt yeebdíh wā jwáub náhniabipna caá. Ded ã íip ã éemp wanat tåttimah, ãih bií déedih ãih pínah ã jumchah yuhna, páantjeh wébít ã jum jwuhchah, caandih en daonít ï jéih yapa jwuhcan caá. Pánih bíböh jwuhcah, caandih en daonít ï niját pah chājat caá náahap. Pánih jumna, teo wāhni pahjeh ã jumna caá. Obohjeéhtih, ã íip ã jenahatji láa ã juyáchah, ãih pínahdih caanjéh ã bíböhbpna caá. ³ Pánihna, jwiít cääcwa Jesucristodih jwī jepahat pínah jåtih, caán wébít panihnit jwī jum jwuhüp jí. Pánih jum jwuhnit, jwī nəowā ded pah ï naawátjidih yap yohatdih áumna, jwípí jepahap jí.*

⁴⁻⁵ Páant jwī jumchah yuhna, ã jenahatji láa ã juyáchah, Dios ã wühdih nin baácna ãt wah bojjip taga. Páant ã wah bojni jwī wüh panijnih ãt cääc jumüp wü tñ. Judío wili caandih mi weh jumchah, Moisés ã wütatjidih caandihbüt túi jepahat ã náahap wü tñ. Jwiítboó caán wütatdih yap yohnit jwī jumchah, ã weh yoobát jwī jumat pínahdih náah yacna, Dios ã wühdih ãt wan wühat tåutüp wü tñ, jwī yéejat peéh chājat déedih ã jíib chājat pínah nijjná. ⁶ Yeebbüt ã weh ñi jumchah, Dios wüh Jesucristojeél jumni Táini Espíritudih

* ^{4:3} Col 2.8,20

yeebdíhbüt ãt wah bojop wüt jĩ. Páant ñijeéh jumna, ã teo wáacachah, “Paá”, úumcanjeh Diosdih ñi jéih niijná caá. ⁷ Pánihna, ã weh jumna, buu teo wähnit panihnit nihcan caá, buca. Páant ã weh yoobát ñi jumuchah, yeebdíh bídí ã túi chäjbipna caá.*

Pablo Galacia baácdih moón Jesúíhwādih ã úum yacat

⁸ Jon jãtih yeéb Diosdih jéih jwahcannit jumna, ñi pãpninadih túi jenah joinít, “Nin pah wã chäjacchah, caán weemdih ã túi chäjbipna caá”, ñipí niij jenah joyóp yuh jĩ. Pánih chäjnit, Dios yoobát ã teo wáacat pínahdih bidcan, nemépwã ï teo wáacat pínahdih bidna ñi chäjap jĩ. Pánih chäjna, queétdih teo wähnit panihnit ñi jumap jĩ. ⁹ Pánih jumna yuhna, buu jwuh Dios yoobátdih ñi jéihyechah, caanbát yeebdíh ã jéihna caá. Páant caandih jéihna yuhna, ¿Dépanihna buu cääcwã oboh ï jenah joyátjhjeh ï naáwátdih ñi jwáub jepah? Pánih jepahna, Diosdih weñaihna yuhna, ñi bujácan niít. Páant ñi bujácat pínahdih jéihna yuhna, ¿Dépanihna ñi nuowã ï naáwátdih yap yohatdih úumnit, teo wähnit panihnit ñi jwáub jum?* ¹⁰ Buu Diosdih weñat téut niijná, nin pahbüt ñi chäjna yuh caá: Jwiít judíowã jwí nuowã ï naáwátdidh jepahnit, jwí wéi láa ded pah jwípí chäjat pah yeebbút biíc yoobó ñi chäjna caá. “Pánih chäjna, jwí túi jumbipna caá”, ñi niij jenah joiná yuh caá. ¹¹ Páant ñi niij jenah joyóchah, yeebdíh bídí úum yacnit, “Weém queétdih túini doonádih bídí wã bohénachah yuhna, ¿buudní pínah niít ãt jumap?” wápí niij jenah joiná caá.

* **4:7** Ro 8.15-17 * **4:9** Col 2.8,20

12 Wā déewā panihnitá, ñijeéh jumna, yeebdíh bohé láa, weemdíh yeejép ñi chājcap jī. Pánihna, bue biíc yoobó weemdíh yeejép chājcan, nin wā naawát pínahdih ñi tái jepahaá: Yeebdíh bohénadíh bejna, Moisés ã wātajjidih jenah joicán, Cristodihjeh yeebdíh wā jepahat tāutap jī. Pánihna, buu Cristodihjeh wā tái jenah joyát pah, yeebbút biíc yoobó ñi tái jenah joyoó. **13** Nindih ñi náhninaá: Tabit wānna, ñi pebhboó chāo jwáhnit, yeebdíh tái ni doonádih wā jwíih naawáp jī.* **14** Páant wānni wā jumchah yuhna, “Pablo dedé pínah nihcan caá”, nijcánjeh, yeéb weemdíh ñi bacat tāutcap jī. Pánih bacat tāutcan, Dioíh ángeldih, Jesucristodihbüt ñi weñat pah, weemdíh ñi tái wēi jwāááp jī. **15** Pánih wēi jwāáhnit, nin pah ñi jumatjidih wā náhnina caá: Weemdíh bádí teo wáaquíhna, dedé wā náahatdih wāhna, ñíih quíibnadih ñita wāat wāh tagaá. Pánih wēinitji yuhna, ¿dépanih tigaá buu wā wihsah, ñi weñatji ã bej? **16** Wā bohénitji jumna yuhna, ¿buu yoobópdih yeebdíh wā naawátji jílib, weemdíh ñi en juih niít? **17** Ñi pebhna jibínitboó “Bádí jwí teo wáacmi caá”, yeebdíh nijjná yuhna, ï jenah joyátboó mácah ã jumna caá. Páant ï nijjichah yuhna, wā bohéátjidih, jwiítdihbüt yeebdíh ï cádaht tāutna caá. Pánih cádahnit, ñijeéh jumnit, ï bohéátboodih ñi jepahat pínahdih ï náah yacna caá. **18** Jwiít cääcwā bita ï tái bejat pínahdih yoobópdih náah yacachah, ãpí tái na caá. Obohjeéhtih, páant nijjná yuhna, mácah jwí jenah joyóchah, ãpí tái na caá. Ñijeéh jumna, wāpí tái teo wáacap jī, ñi tái jumat pínah nijjná. Buu ñijeéh wihsah yuhna, biíc

* **4:13** Hch 16.6

yoobó ñi túi jumat pínahdih wā náah yacna caá.
19 Yeebdíh bádí wā oyochah, wā weh panihnit ñi jumna caá. Pánih oinit, yeebdíh bádí wā náhni dahwana caá. Pánih bádí mácah jenah joiná, yad wili mi weép jáaat pah t̄abani wā jumna caá. Pánih jumna, ded pah Cristo ã jumatjí pah yeebbát ñi jumat pínahdih bádí wā náah yacna caá.* **20** Butéh ñijeéh wā jumachah, ãta túi tagaá. Pánih biícdih jumna, jāihcanjeh naóhnik, yeebdíh wā jéih míic wéhenachah, chah ãta túi tagaá. Obohjeeéhtih, ninboó jumna, yeebdíh bádí mácah jenah joiná caá wā chājap.

Agar Sarajīh ded pah ījumatjí

21 Yeéb weemdíh ñi joi jwáhuu. Biquína Diosjeéh túi jumíhna, jwiít judíowā jwī nuowā ñi naáwátjidih ñi jepahna yuh caá. Caandíh jepahíhna yuhna, ded pah ñi naóh daacátjidih ñi túi beh joicán caá. Pánih beh joicánnit ñi jumachah, nin pah Moisés ã daacátjidih wā naóhbipna caá, ñi túi beh joyát pínah nijjná: **22** Abraham chénewā ãt weh jumap wut jí. Caandíh teo wáhnih Agar biíc mit wáh jumap wut jí.* Ñ áa yoobát Sarabut biíc mit wáh jumap wut jí.* **23** Pánihna, caandíh teo wáhnihboó, jáap wili jumna, Ismael pínahdih mit weh jumap wut jí. Obohjeeéhtih, “Majeéh boli, Sara newé weépdih mi weh jumbipna caá”, Dios Abrahamdih ã nijjátji pahjeh, Saraboó t̄ab beh wili jumna yuhna, Isaac pínahdih mit weh jumap wut jí.

24-25 Queét chénewā yaádhdih ded pah ã yapatji jwiítdih ã túi naóhna caá. Teo wáhnih Agardih

* **4:19** Ro 8.29; 2Co 3.18; Fil 3.10 * **4:22** Gn 16.15 * **4:22** Gn 21.2

jenah joinít, Arabia baácboó jumni Sinaí jeéboodíh jwī jenah joiná caá. Caán jeéboó Dios Moisésdih ã wutatjidih át wāhüp wut jī, jwī n̄owā í tái jepahat pínah nijiná. Caán wutatdih jepahna, teo wāhnit pah ít jumap jī. Pánihna, Agar teo wāhnih mi jumat pah, jwiít cäacwā caán jeéboó ã wutatjidih jepahíhnit, jwiítbut teo wāhnit panihnit jwī jumna caá. Páant ã jumuchah, caán Sinaí jee páñihni teo wāhnih Agar mit jumap jī. Pánihna, caánt teo wāhnih caán jee páñihnih mi jumat pah, buu Jerusalén túchidih moón caán wutatdih jepahíhnit, mi jumená panihnit í jumna caá. Páñih jumnit, queétbut biíc yoobó teo wāhnit panihnit jumna, Dios weh í nihcan caá.

²⁶ Obohjeéhtih, teo wāhcannih Saraboodíh jenah joinít, “Majeéh bólí Sara newé weépdih mi weh jumbipna caá”, Dios Abrahamdih ã nijátjidih jwī náhnina caá. Pánihna, Abraham Dios ã nijátjidih ã tái jenah joyátji pah, jwiítbut Cristodih túi jenah joinít jumna, Sara mi jumená panihnit jwī jumna caá. Páñih jumnit, Dios pebhboó jumni jáap Jerusalén túchidih moon páñihnit jwī jumna caá.

²⁷ Dios naáwátdih naóh yapani Isaías jwī éet Sara ded pah mi yapatjidih jenah joinít, nin baácboó jumni Jerusaléndih, jeáboó jumni Jerusaléndihbut ded pah ã yapat pínahdih Dios át jenah joyát tāutap jī. Caandih jenah joinít, nin pah át niíj daacáp tajī: “Weh wihcannih, búdí ma wēi ñaacá. Weép jumna tābatdih jéihcannih jumna yahna, ma weh jumbipna caá. Ma jumená dawá jumnit, meemdih teo wāhnih mi jumená chah í jumbipna caá. Pánihna, ma tái weñee”, át niíj daacáp tajī. *(Is 54.1)*

Páant niíj daácnit, chah dawá mi j̄aimená ī j̄amat pínahdih naóhna, jeáboó j̄amni Jerusalén tútchibooó dawá Jesucristodih jepahnitji ī j̄amat pínahdih niíj naóhna át chājap tají. Agardih Abraham ã yohat pah nin baácboó j̄amni Jerusaléndih ī yohat pínahdihbat niíj naóhna át chājap tají.

28 Pánihna, Dios ã nijjátji pahjeh Sara wãúh Isaac át cääc jumap wut jí. Pánihat pah, “Weemdih ma tái jenah joyát jíib, nihat baácdih moondih wã tái chājbipna caá”, Dios Abrahamdih ã nijjátji pah, Cristodih jepahnit ñi j̄amuchah, yeebdíhbüt át tái chājap taga. **29** Queét chénewä ã wehdih ded pah ã yapatjibüt jwiítdih nin pah ã bohéna caá: Dios ã nijjátji pahjeh Táini Espíritu ã teo wáacachah, Isaacji át cääc jumap wut jí. Páant ã cääc j̄amuchah ennit, ã úud jeñé Ismaeljiboó caandih eníhcan, yeejép át chājap wut jí.* Búubüt ã chājatji pahjeh jwí nəowä ī naáwátjidih jepahíhnitboó jwiít Cristodih jepahnit-dih yeejép ípí chājna caá. **30** Páant yeejép ī chājachah yuhna, Moisés nin pah ã niíj daacátjidih jwiítdih tái jenah joyát caá náahap: “Sara mi áa Abrahamjidih nin pah mi nijjichah, Dios át jepahat túutap wut jí: ‘Jwiítdih teo wãhnih wãúh, Ismael, míih bií déedih á jéih bíbohcan niít. Jwí wãúh yoobát Isaacboó caandih ã bíbohkipna caá. Pánihna, jwiítdih teo wãhnihdih mi wãúhjih biáboó ma bejat túutú’, mit nijjíp wut jí”, Moisés át niíj daacáp tají.* Páant ã niíj daacátjidih jenah joinít, jwiít Isaac panihnit jwí j̄amuchah, Dios caandih ã tái chājat pah, jwiítdihbat ã tái chājbipna caá. **31** Pánihna, wã déewä panihnitá, teo wãhnih Agar mi j̄aimená panihcan,

* **4:29** Gn 21.9 * **4:30** Gn 21.10

teo wāhcannih Saraboó mi j̄aimená panihnit jwī jumna caá.

5

Teo wāhnit panihnit jwī j̄amatdih Cristo ā cádahat túutat

¹ Teo wāhnit panihnit jwī j̄amcat pínah niijná, Cristo jwiítdih āt wān wāhp wāt jī.* Páant ā wān wāhachah, “Caandíh tái jenah joiná, Dios biícdih wā tái j̄umbipna caá”, niijnít, caandíh ñi jepahap jī. Pánih jepahnit, “Moisés ā wātatjidih wā tái jepahachah, Dios weemdih ā tái enbipna caá”, ñi niij jenah joicá bojoó. Jesúsdih cádahcanjeh, tái wēp ñuhnit panihnit ñi jumna. Pánih jumnit, bita ī wātatdih jepahcanjeh, teo wāhnit panihnit ñi jwūub waadcá bojoó.

² Weém, Pablo, nindih wā naawáchah, ñi tái jenah joyoó: “Bóodnit jumna, Diosjeéh jwī tái j̄umbipna caá”, niij jenah joinít, ñi míic bóodat túutchah, Cristo yeebdih ā wān wāhatji dedé pínah ñata nihcan tagaá. ³ Būutéh wā niiját pah, wā jwūub naóhbipna caá. Ded bóodat túutniboodih nihat Moisés ā wātatjidihbüt jepah beedáát caá náahap. ⁴ Diosjeéh tái jummat túut niijná, caán wātatdih tái jepahíhnit jumna, yeebjéh Cristo-boodih ñi cádahna caá. Pánih jepahíhna, Dios yeebdih oinit, ā teo wáacatdihbüt míic jāhna caá ñi chājap.

⁵ Obohjeéhtih, jwiítboó Táini Espíritu ā teo wáacatjih Cristodih jwī tái jenah joiná caá. Páant jwī tái jenah joyóchah, “Queét túinit caá”, jwiítdih

* **5:1** Jn 8.32-36

Dios ã niíj enna caá. Páant niíj ennit, ã pebhboó jwī juiibínachah, jwiítdih ã túut nuúam péabipna caá. Páant ã túut nuúam péanachah, táinit yoobát jwī jumat pínahdih jwī pâina caá. ⁶ Pánihna, jwiít Jesucristoíhwā bôodnit jumna, bôodcannitbut jwī jumachah, Dios jwiítdih biíc yoobó ã enna caá. Cristodih tâi jenah joiná, bitadih tâi oinit, teo wáacnit jwī jumachah ennit, Dios jwiítdih ã tâi wêibipna caá.

⁷ Wâ déewâ panihnitá, yeéb Cristodih ñi tâi jenah joyóp yâh jî. Obohjeéhtih, tâini dooná yoobátdih ñi tâi jenah joyóchah yuhna, ¿déhe tibeé yeebdíh cádahat túutni? ⁸ Dios yeebdíh ñíoniboó queétdih páant ãt naáwát túutcan tagaá. ⁹ Nindih ñi náhninaá: Búdí pan pínahdih ã paa béjat pínah nijiná, bainíbit paáát túutnijeh ã náahna caá. Pánihat pah, wâ tâttimah jâóhniit, yeebdíh mácah ï bohénachah, daocánnit yuhna, dawá yeebdíh ï tûut nuúmât túutna caá.* ¹⁰ Obohjeéhtih, jwī Maáh Jesúsdih wâ tâi jenah joyóchah, weemdih weñanit, nin pah ã niíj jenah joyát túutna caá: “Jwī Maáh queétdih ã tâi teo wáac bipna caá, queétdih mácah ï bohéátdih cádahnit, wâ bohéátdih yoobópdih ï jwâub jenah joyát pínah nijiná”, ã nijiná caá. Obohjeéhtih, ded yeebdíh yéejaniboodih Dios bâdí ã peéh châjbipna caá.

¹¹ Wâ déewâ panihnitá, queét mácah naóhniit weemdih nin pah ï niíj yeeena caá: “‘Bóodat túutnit, Diosjeéh ñi tâi jumbipna caá’, Pablo ãpí niíj naóh bohena caá”, ï nijiná yâh caá. Páant wâ bohénachah nihna, queét weemdih yeejép ïta châjcan tagaá.

* ^{5:9} 1Co 5.6

Obohjeéhtih, cruzboó Jesucristo ã wən wāhatjidih wā bohéát peéh weemdíh ī jāihna caá. ¹² Pánihna, bóodat tāutnitboó, yeebdíh yeejép ī chājat peéh, biáboó ī beje naáh.

Oina, w̄tatdihb̄t jw̄i jepahat

¹³ Wā déewā panhnitá, “Wā w̄tatdih jepahna, wājeéh ī tái jumipna caá”, Dios yeebdíh n̄ionit, ãt niíj jenah joicáp jī. Obohjeéhtih, watnit panhnit jumna, “Buu caán w̄tatdih jepahcan, ded pah yeejép wā jenah joyátdihjeh wā chājbipna caá”, n̄i niíj jenah joicá bojoó. Páant niíj jenah joicánjeh, bádí oinit, n̄i tái míic teo wáacá.* ¹⁴ Moisésjiboo nin pah ãt niíj w̄tatdihb̄t jī: “Meém míicjeh ma míic oyat pah, bitadibh̄t oinit, ma tái teo wáacá”, ãt niijíp jī.* Pánihna, bitadibh̄t tái oina, nihat biíh ã w̄tatdihb̄t tái jepahna caá jw̄i chājap.* ¹⁵ Nuñépwā ī míic chācacát pah, mácah bohénitdih joiná, yeebjéhb̄t t̄abit míic jāihna caá n̄i chājap. Páant n̄i chājatdih cádahcan, yeebjéh n̄i míic yéeba beedábipna caá.

Táini Espíritu ded pah jwiútdih ã náah yacat

¹⁶ Nin pah yeebdíh wā niíj wēp naóhna caá: Táini Espíritu ã teo wáacatjīh ded pah yeebdíh ã náah yacat pahjeh n̄i tái jumū. Pánih jumna, yeejép n̄i jenah joyát pah n̄i chājcan niít. ¹⁷ Ded pah jwiútdih yeejép jw̄i náahatdih chājna, Táini Espíritudih en jāihnit dée pah jw̄i jumna caá. Caán ã náah yacatdih chājna, jw̄i náahatboodíh jw̄i chājcan niít. Páant ã jumuchah, ded pah yeejép jw̄i jenah joyátdihjeh chājcan, Táini Espíritu ã náah yacatdih chājat caá

* ^{5:13} Mt 20.26 * ^{5:14} Lv 19.18 * ^{5:14} Ro 13.8-10

náahap.* **18** Túini Espíritu ded pah ã náah yacatdih chājnit jumna, “Diosjeéh wā tāi jumat tāut niijná, Moisés ã wātatjidih túi jepahat caá weemdih náahap”, ñi niíj jenah joicán caá.

19 Diosdih jepahcannitboó yeejép ï jenah joyátdihjeh chājnit, nin pah ï chājatdih jwiít nihat jwī jéihna caá: Yéej chājnit, yéej chājatdih jenah joinít, tíc jenah joicánjeh ií náah chājnit ï jumna caá. **20** “Nin weemdih teo wáacni caá”, Dios yoobát nihcannidih niíj wēinit, jióhnit, míic eníhcannit, míic jūihnit, bita ï bíbohatdih en finahnit, waícanjeh íijnit, bitadih teo wáacatdih jenah joicánjeh, queéjtjeh maáta pah jenah joinít ï jumna caá. Míic en jūihnit, tútchi wahnit, “Yeéb mácah moón caá”, niíj en jūihnit ï jumna caá. **21** Bita ï tāi jumuchah en íijnit, máihnit, máihñatdih yaádh metatdihbüt bidnit, bádí babhbat dooná jumat joiná wēinit ï bejna caá. Pánihat caá yéej jenah joinít, ipí chājna caá. Jātih yeebdih wā niiját pahjeh, báubüt wā jwúub niíj naóhna caá: Det pánih chājnit Dios ã maáh jumupboó ï jéih jumcan caá.

22 Obohjeéhtih, Túini Espíritu ã teo wáacatjih nin pah jwī jumna caá: Dios jwiítdih ã oyatdih jéihnit, túi wēinit, jwiítbüt bitadih jwī oina caá. Uamcan, túinijeh jwī jumna caá. Yójahcan, ded pah bita ï chājachah yuhna, queétdih waícanjeh íijcan, túinijeh jwī jumna caá. Bitadih túi teo wáacnit, túi chājnit jwī jumna caá. Diosdih, cāacwādihbüt ded pah jwī niijátji biíc yoobó péanit jwī jumna caá. **23** “Weém chah jéihni wā jumna caá”, jwī niijcán caá. Ded pah yeejép chājat jenah joyát ã júuwáchah yuhna,

* **5:17** Ro 7.15-23

caandíh joyáh bojnit, jwī chājcan caá. Páant jwī chājachah ennit, “Moisés ã wātatjidih jepahcan, queét yeejép ï chājna caá”, det ï jéih niijcán caá. ²⁴ Jesucristoíhwā jumna, yeejép chājat jwī jenah joyátjidih jwī jepah cádahap jī.* ²⁵ Pánih cádahnit, Túini Espíritu ã náah yacatboodíh wēi jepahnit, jwī chājat dée caá.

²⁶ Pánih chājnít, “Wā déewādih chah wā jéihna caá”, niíj jenah joicánjeh, jwiítjeh jwī míic íijacan, jwī déewā ï túi jumuchah ennit, jwī en íijca bojat dée caá.

6

Jesúíhwā ï míic teo wáacat

¹ Wā déewā panihnitá, ñi táí míic teo wáacá. Pánih míic teo wáacnit, biíc ñijeéh jumni ã táí chājcatdih ennit, Táini Espíritu ã teo wáacatjih caandíh ñi túi míic wéhenaá, tāut nūamnít, túinijeh ã jwāub chājat pínah niijná. Pánih teo wáacnit, yeéb míicjehbut ñi túi chāja chaáh, “Yeejépdih chājná”, niijná. ² Ñijeéh jumnit yeejép ï yapachah enna, queétdih ñi teo wáacá. Pánih míic teo wáacna, Cristo ded pah ã náah yacatdih jepahna caá ñi chājap.

³ “Bita chah táí chājni jumna, dedé teo wáacatdih wā náahcan caá”, ded niíj jenah joiná, caanjéh míic yeena caá ã chājap. ⁴ Ded pah ñi chājatdih jenah joinít, “Nin táini caá. Caán yeejép caá”, niíj jéihyat caá náahap. Pánih jéihna, ded pah ñi chājat táini ã jumuchah, bitadih ded pah ã yapatdih jenah joicánjeh, ñi túi wēibipna caá. ⁵ Jesús jwiítdih ded pah ã náah yacatdih jepahna, jwī jepahcahbüt

* **5:24** Ro 6.3-14; Gá 2.20; 6.14

jwiítjeh jwī ñíwat pínah ã jumna caá. Bitaboó jwiítdih ï jéih ñío wãhcan caá.

6 Det táini doonádih bohénitboó queétdih naóhnidih ï tái teo wáaca naáh, dedé ã náahatdih ã bíbohat pínah nijjná.

7 Ded pah jwī chājatdih jenah joinít, nindih náhniat caá náahap: Jwiít cääcwäboó dedédih jwī momochah, caanjéh ã jwáub chíih jãuwáchah, caandíhjeh jwī bíbohbipna caá. Táininaidih ñionit, jwī momochah, táini ã chíih jãóhbipna caá. Obohjeéhtih, yeejépnadih jwī momochah, táicanni ãta chíih jãóh tagaá. Pánihat pah, jwiít cääcwädihbut biíc yoobó ã jumna caá. Ded pah jwī chājachah, biíc yoobójeh mäntih jwiítdihbut ã yapbipna caá. Ni tái náhninaá, Dios nihat jéhnidih jwī jéih tíohcan caá. Pánihna, “Weém wã tái chājcatdih Dios ã encan caá”, ñi niíj míic yeeca bojoó.* **8** Ded ã weñat pínahdihjeh chājna, yeejép ã chājachah, ã yéej chājat jíib, iiguípna ã bejbipna caá. Obohjeéhtih, ded Táini Espíritu ã náah yacatboodih jepahna, ã tái chājat jíib, páantjeh Diosjeéh ã jumbipna caá. **9** Dios ã jenahat láa, tái chāj cádahcan, táinidih jwī bíbohbipna caá. Páant jwī bíbohat pínahdih jéihnit, tái chāj chuecán, jwī cádahca boj jíih.* **10** Dedé teo wáacatdih ï náahachah, jwī buñjáát pah bóo, nihat cääcwädih jwī tái chāj jíih. Jwī déewã panihnit Jesúíhwädih bácah, chah jwī míic tái teo wáacat dée caá.

Pablo naóh péanit, ã tuyat túutat

11 Nin náodih wã chéen ã daác wãhüp be. Pánihna, nin péeni naáwátdih dahwani wã

* **6:7** Pr 22.8; Os 8.7 * **6:9** 2Ts 3.13

daacátdih ennit, “Pablojeh jwiítdih ãt daác wahap taga”, ñi niíj jéihbipna caá.

12 Buu queét yeebdíh yee bohéndih wã jwáub naóhbipna caá. Queét yeebdíh bóodat túutnitboó jwí déewã queétdih ï wẽi enat pínah nijiná, páant ï bohéna caá. Jesús cruzboó ã wñan wãhatjidihjeh bohéna, queétdih jãihnit, jwí déewã yeejép ïta chãj tagaaá. Páant yeejép yapatdih náahcan, queét yeebdíh ï bóodat túutna caá. **13** Queét bóodat túutnitboó Moisés ã wãtatjidih táí jepah beedácan yuhna, yeebdíh caandíh jepahat túutnit, ï bóodat túutna caá. Bita jwí déewã “Queétboó Gálatasdih moón Jesúíhwãdih ït táí bóodat túutup tagaá”, queétdih ï niíj wẽi naawát pínah nijiná, páant ï bohéna caá. **14** Obohjeéhtih, cãacwã weemdíh ï táí wẽi naawát pínahdih weémboó wã bidcan caá. Pánih bidcan, jwí Maáh Jesucristo cruzboó ã wñan wãhatjidihjeh cãacwã ï wẽi naawát pínahdih wã náah yacna caá. Weemdih ã wñan wãhachah, nemép Dioíh nihcannitdih yeejép ã chãjat túutuchah yuhna, weémboodih ã bãujácan niít. Páant yeejép ï chãjachah yuhna, wã en yaccan niít. **15** Jwiít Jesucristoíhwã jumna, Dios jwiítdih ã enechah, bóodnit, bóodcannitbut jwí jumuchah, biíc yoobó dedé pínah nihcan caá. Obohjeéhtih, túiniboodih jwí túut nãumachah ennit bácah, bádí yoobát ã wẽi enna caá.*

16 Nin wã bohéátdih táí jepahnit, Diosjeéh ãumcanjeh ñi táí jumua. Dios yeebdíh jígah ennit, ã teo wáaca naáh. Biíc yoobó ã teo wáacat pínahdih nihat ãihwãdih wã náah yacna caá.*

* **6:15** Jn 3.3-7; 2Co 5.17 * **6:16** Sal 125.5; 128.6

17 Nin wā pée naáwátbit caá: Jwī Maáh Jesúsdih teo wāhni wā jumat jíib, weemdíh ī pñat yahwítji páantjeh wñih bácahdih wā dñoná caá. Páant yaoh dñoní wā jumuchah ennit, “Pablo Jesúlh táini doonádih Dios ã naáwát túutni nihcan caá”, weemdíh ī jwáub niíj tac bñugáca bojo naáh.

18 Wā déewā panihnitá, jwī Maáh Jesucristo yeéb nihatdih bádí oinit, ã túi teo wáaca naáh. Pánih náah yacnit, yeebdíh bádí oinit, wā túyat túutna caá.

Páant bóojeh tigaá wā daacát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xxx

PDF generated using Haiola and XeLaTeX on 11 Nov 2022 from source files
dated 29 Jan 2022
34c9543b-57a6-5290-ab7b-4fa15529a7e2